



Ikinyamakuru k'imihindagurikire y'ikirere N°03, kigenewe abahinzi- borozi, igice cya gatatu Mutarama (21- 31), 2021

Cyasohotse ku itariki ya 2 Gashyantare 2021

Incamate


Mu minsi icumi y'igice cya gatatu, Mutarama 2021 kuva tariki ya 21 kugeza tariki ya 31, byagaragaye ko imvura yagabanutse cyane kuko tugeze mu Urugaryi. Imvura iri muni y'ikigereranyo cy'impuzandengo y'imvura isanzwe igwa muri ayo matariki yapimwe ahenshi mu gihugu. Imvura nyinshi yapimwe mu Ntara y'Iburengerazuba ku bupimiro bwa Mibirizi ahapimwe milimetero 91.9 mu minsi 5, ikurikirwa n'ubupimiro bwa Ntendezi hapimiwe milimetero 88.0 mu minsi 8 ndetse no ku bupimiro bwo ku Kibuga cy'indege cya Kamembe hapimiwe milimetero 64.5 mu minsi 6. Naho imvura nke iri muni ya milimetero 10 yapimwe ku bupimiro bwinshi bwo mu ntara y'Iburasirazuba n'iy'Amajyepfo. Iyipimo by'ubushyuhe ni nk'ibisanzwe biboneka mu gice cya gatatu cya Mutarama. Imirimo y'ubuhinzi ubu iri mugihe cy'isarura.

1.0 Imvura yaguye

Aha turerekana ingano y'imvura yaguye, kwiyongera no kugabanuka kw'imvura, ikigereranyo cy'imvura yaguye n'isanzwe igwa, umubare w'iminsi imvura yaguye n'ubuhehere bw'ubutaka.

1.1. Ingano y'imvura yaguye


Ikarita ya mbere hasi irekana ingano y'imvura yaguye mu minsi icumi y'igice cya gatatu cya Mutarama 2021. Muri iki gice imvura yapimwe yari muni y'ikigero y'imvura isanzwe igwa ahenshi mu gihugu. Imvura nyinshi yapimwe mu Ntara y'Iburengerazuba ku bupimiro bwa Mibirizi ahapimwe milimetero 91.9 mu minsi 5, ikurikirwa n'ubupimiro bwa Ntendezi hapimiwe milimetero 88.0 mu minsi 8 ndetse no ku bupimiro bwo ku Kibuga cy'indege cya Kamembe hapimiwe milimetero 64.5 mu minsi 6.



Ikarita ya 1: Ingano y'Imvura yaguye mu gice cya gatatu cya Mutarama 2021

1.2 Kwiyongera/kugabanuka kw'imvura ugereranyije n'impuzandengo.


Nkuko bigaragara ku ikarita ya kabiri mu gihugu hose imvura yabaye nke cyane mu bice byinshi by'igihugu uretse ku bupimiro buke bwo mu ntara y'Iburengerazuba n'iy'Iburasirazuba.




Ikarita 2 :Kwiyongera no kugabanuka kw'imvura mu gice cya gatatu cya Mutarama 2021

1.3.Ikigereranyo cy'imvura yaguye n'isanzwe igwa mugihe kirekire.

Ufatiye ku bipimo by'igihe kirekire, ishusho ya 1 n'ya 2, ziratwerekana ingano y'imvura yaguye ugereranyije n'ingano y'imvura isanzwe igwa mu minsi icumi y'igice cya gatatu cya Mutarama 2021. Bigaragara ko imvura yaguye yari nke ugereranyije n'isanzwe igwa ahenshi mu gihugu.




Ishusho 1 : ikigereranyo cy'imvura mu Mujyi wa Kigali, Intara y'Amajyepfo n'iy'Iburengerazuba



Ishusho 2: ikigereranyo cy'imvura mu ntara y'Amajyepfo n'iy'Iburasirazuba

1.3.Umubare w' iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya gatatu mu kwezi kwa Mutarama 2021. Umunsi tubara ko wagushije imvura ni uwapimweho byibuzwe milimetero 0.85 cyangwa nyinshi. Muri iki gice nibura ahantu henshi hagushije imvura hagati y'umunsi umwe n'iminsi umunani (1-8) uretse ku bupimiro bwa Byumba na Muramba_Cyabingo hatagize umunsi numwe. Biteganyijwe ko mugice cya mbere cya Gashyantare imvura izagwa hagati y'umunsi umwe n'iminsi itatu.



Ikarita ya 3: Umubare w'iminsi imvura yaguyemo

1.4 Ubuhehere bw'Ubutaka


Aha turagaragaza muri rusange uko ubuhehere bw'ubutaka bwari bumeze. Ahenshi mu gihugu ubuhehere bw'ubutaka muri iyi minsi icumi y'igice cya gatatu cya Mutarama 2021 bwaragabanutse bitewe n'ibihe by'imvura nke cyane byaranze iki gice. Hateganyijwe ko ubuhehere bw'ubutaka buzakomeza kugabanuka mu gice cya mbere cya Gashyantare 2021, bitewe nuko turi mugihe cy'Urugaryi.

2.0. Iyipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

2.1 Iyipimo cy'ubushyuhe bwo hejuru


Ikarita ya 4 irekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigereranyo cy'impuzandengo y'igihe kirekire, mu Ntara y'Iburasirazuba, mu Mujiyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi. Mu Ntara y'Amajyaruguru n'iy'Iburengerazuba akaba ariho hakonje ugereranyije n'ahandi mu gihugu. Iyipimo by'ubushyuhe byari hagati ya dogere Selisiyusi 21.2 na 28.2 ahenshi mu gihugu, uretse ku bupimiro bwa Bugarama hashyushye cyane hapimwe dogere selisiyusi 30.6.



Ikarita ya 4: Ubushyuhe bwo hejuru

2.2. Igipimo cy'ubushyuhe bwo hasi

Ikarita ya gatanu irekana uko ubushyuhe bwo hasi bwanganaga. Ubushyuhe bwo hasi bwari hagati ya dogere Selisiyusi 09.4°C (Busogo) na dogere Selisiyusi 18.7°C ku bupimiro bwa Bugarama. Mu Majyaruguru y' u Rwanda niho hakonje cyane kurusha ahandi mu gihugu.



Ikarita ya 5: Ubushyuhe bwo hasi

3.0 Iteganyagihe rigenewe abahinzi mu minsi icumi y'igice cya mbere cya Gashyantare (tariki 1-10) 2021

3.1 Ikirere giteganyijwe

Mu gice cya mbere cy'ukwezi kwa Gashyantare 2021 (kuva tariki ya 1 kugeza kuya 10) mu Rwanda hateganyijwe imvura iri hagati ya milimetero 0 na 75. Mu gihugu hose hateganyijwe igabanuka ry'imvura rizagaragarira no mu igabanuka ry'umubare w'iminsi imvura iteganyijwe kubonekaho.

Imvura iteganyijwe ikazaba iri mu kigereranyo cy'impuzandengo y'imvura isanzwe igwa mu minsi icumi y'iri teganyagihe mu gihugu hose. Imvura iteganyijwe mu gihugu mu buryo bukurikira:


Intara y'Iburasirazuba: Hateganyijwe imvura iri hagati ya milimetero 0 na 15.

Umujyi wa Kigali: Hateganyijwe imvura iri hagati ya milimetero 0 na 15.

Intara y'Amajyepfo: Mu turere twa Kamonyi, Ruhango na Nyanza, mu majyaruguru y'uturere twa Huye na Gisagara no mu majyepfo ya Muhanga hateganyijwe imvura iri hagati ya milimetero 15 na 30. Amajyaruguru ya Muhanga, mu gice cy'iburasirazuba cya Nyamagabe na Nyaruguru n'ahandi hasigaye mu turere twa Huye na Gisagara hateganyijwe imvura iri hagati ya milimetero 30 na 45. Ahasigaye mu turere twa Nyaruguru na Nyamagabe hateganyijwe imvura iri hagati ya milimetero 45 na 60, ariko mu burengerazuba bw'utu turere ibice biherereye muri Pariki ya Nyungwe hateganyijwe imvura izagera kuri milimetero 75.

Intara y'Iburengerazuba: Mu turere twa Nyabihu, Ngororero na Karongi, mu majyepfo y'akarere ka Rutsiro n'amajyaruguru y'akarere ka Rubavu na Nyamasheke hateganyijwe imvura iri hagati ya milimetero 30 na 45. Mu burengerazuba bw'akarere ka Rusizi n'ahasigaye mu turere twa Rubavu, Rutsiro, na Nyamasheke hateganyijwe imvura iri hagati ya milimetero 45 na 60. Mu burasirazuba bw'akarere ka Rusizi gahegereye muri Pariki ya Nyungwe hateganyijwe imvura igera kuri milimetero 75.

Intara y'Amajyaruguru: Mu burengerazuba bw'uturere twa Musanze na Gakenke no mu majyaruguru ya Burera hateganyijwe imvura iri hagati ya milimetero 30 na 45. Mu karere ka Rulindo, mu majyepfo y'akarere ka Burera, mu burasirazuba bwa Musanze na Gakenke hateganyijwe imvura iri hagati ya milimetero 15 na 30 naho mu majyepfo y'akarere ka Gicumbi hateganyijwe imvura iri hagati ya milimetero 0 na 15.



Ikarita ya 6: Iteganyagihe ry'imvura mu gice cya mbere cya Gashyantare 2021.

3.2 Ibirebana n'imirimu y'ubuhinzi

Inzego z'ubuhinzi ziragirwa inama yo gukomeza kwitwararika mu imirimu y'isarura n'ihunika kuko muri iki gice cya mbere cya Gashyantare ibihingwa byinshi birimo gusarurwa. Abahinzi barashishikarizwa gukomeza kugisha inama abashinzwe ubuhinzi babegereye mu gukomeza gutegura neza imirimu ijyanye n'ubuhinzi. Barashishikarizwa kandi kujya basura urubuga rwa Meteo Rwanda www.meteorwanda.gov.rw, cg guhamagara umurongo utishyurwa 6080.